

萬

曆

疏

鈔

萬曆疏鈔卷四十

邊功類

馮景隆 總鎮重臣冒功掩罪大肆欺罔疏

胡克儉 邊臣禦虜不實朝臣謀國不虛疏

王德完 嶺海冒功疏

涂宗濬 經畧大臣流言惑衆大負國恩疏

楊東明 秉虛心持大體以明功罪疏

吳文梓 東征功次叙錄當議疏

劉仕瞻 西陲事急勢危督臣謀疎心狡疏

目錄

卷四十

吳允中  
論虜王受封疏

萬曆疏鈔卷四十

邊功類

總鎮重臣冒功掩罪大肆欺罔伏乞宸斷重懲積弊以固邊防疏

馮景隆

南京工科給事中  
萬曆十一年九月

臣惟國家所最重者在邊務所以馭守邊之臣者在賞罰而賞罰之得當者在勘報若勘報不實致無功冒賞有罪逸誅則勸懲倒置諸將解體其遺邊患豈淺淺哉臣於今年六月內接得邸報見薊遼總督周

詠等查叅遼大寧堡失事官員要將叅將熊朝臣備  
禦朱廷慶重寃副使任天祚併寃副總兵李平胡等  
功准總兵李成梁巡撫李松等免寃隨該兵部行勘  
覆奉欽依各照處分臣以爲邊關之託全在總督與  
鎮守重臣故有功論賞旣先諸將而獨膺厚賚則有  
罪論罰當視諸將而先任已辜以今觀大寧堡之敗  
也先期探知屬夷董狐狸等結約東虜搶關報讎則  
申嚴號令分布兵馬量地要害增益防守皆總鎮事  
也本月十二日大寧堡旣因雷雨衝壞城垣則一時

所恃爲防禦者全賴僭集軍士併力守護耳何乃止  
存官軍四十員名被賊一擁而入射死守堡將官殺  
虜男婦至一百二十餘名房屋燒燬畜馬一空賊且  
全軍而去如入無人之境近來虜之得志未有若此  
者其在熊朝臣等固難逃畏避之誅在周詠與李成  
梁等均任干城全無調度聽將官棄堡與虜而不之  
救大損威重罪莫大焉周詠不卽自陳認罪乃云總  
兵李成梁巡撫李松驚報無時兵力有限且謂竊襲  
實出不意遙制頗難噫是何言也大抵虜之犯境非

突來則竊襲此其叵測之常也而當事者先時無制  
勝之策臨時以遙制爲難則安用彼將哉顧爲李成  
梁等祈請免罰詠實自爲之地耳勝則攬功於已敗  
則歸罪於人其爲衆心勃勃不平甚至於薊鎮之失  
事也虜且襲破黑谷關連破峯臺燒香諸寨殺擄人  
畜燒燬房屋離披狼狽舉目悽慘其爲衆覩共聞者  
何可掩也詠反報稱官軍奮勇敢退欲分別敘賚是  
不惟飭辭掩罪且以敗爲功何其欺罔一至於此及  
巡按御史李植以得於親歷會勘者指實言之詠欲

自飾其罪乃復云正據該道協守稟報撫辭虛辯臣  
愚謂在該道等官固不可欺總臣在總臣尤不可欺  
朝廷夫冒功掩罪國有常憲而詠也敢於扶同妄報  
者此蓋邊臣歷年以來積習舊弊詠實踵之而不虞  
巡按之廉得其情也使按臣但循故事委官訪報而  
不躬爲閱勘則功罪情狀盡屬欺蔽雖重鎮殘破如  
此非惟不加之罪且將議賞以嘉其功矣不知詠於  
此時尙肯自鳴前報之爲虛而讓其功於不居耶臣  
知其必不然矣且詠向同御史于應昌誣陷劉臺致



死其罪與應昌同科荷 皇上優容不卽加罪蓋爲  
邊疆重寄欲其實心任事以責後效耳詠不思感恩  
圖報屢致失事已有的據而猶然強辯其有負於

皇上不旣多乎似此欺罔而不重加懲治誠恐各邊  
效尤其患有不可言者 臣訪之邊境來人語及報功

一節率皆切齒痛恨蓋凡所謂追剿擒戮者其間真  
正虜人十無一二有將賊人殺死邊軍取其首級以  
邀賞者有將流寓商賈殺死以充虜級者有被賊人  
拏我軍士爲之先驅誘敵於我而自相格殺者有見

賊人來則深避伺其旣退而掩襲一二以爲全勝者  
朦朧敘列欺蔽聖聰今日報捷明日告廟而論功之  
命下矣論功而總鎮之陞陟首及矣習以爲常恬不  
知怪卽遼東總兵李成梁屢次奏稱擒剿大功率皆  
類此夫遼夷種落雖繁其強弱之分原非止虜者比  
但多勾引達虜爲我邊患則相機制馭固鎮臣分內  
事也今自成梁鎮守以來該鎮告警殆無虛日而虜  
退必奏膚功亦無虛日究其禦虜之狀或對壘而相  
冒矢石或乘虛而襲破殘弱非無一二可飾耳目者

然殺傷士卒而匿不以聞虧折家兵而旋爲補足其所稱自全者大都如此而所稱擒戮者如臣所謂取我邊上軍民自戍以報功者蓋居多也使成梁果能數數以全取勝虜將聞風遠遯之不暇矣何乃畧不懲創而歲侵無已耶蓋因遼東地遠任其捏報而勘覈不真且成梁不惜重賄餽送要津動以千百而人皆樂爲之朦蔽故得歷陞伯爵今伯而且世襲矣其諸子姓廕以錦衣外衛等官者又不止一二十輩臣觀先朝開國元勲運籌決勝功如劉基者止於封伯

成梁之功視基何如而亦得世此爵耶開疆闢宇功如徐達者止得世公旁無他廕成梁之功視達何如而冒廕如許其多耶人臣之義貴知止足錫予之恩不宜太濫昔宋太祖於曹彬而靳使相之與蓋有見於此耳今成梁所禦者易制之屬夷而所享報功之典則視啓運開國之臣而反過之且肆然貪冒無有底極頃者該鎮失事詠不併論其罪而反爲曲護卒得免究其何以伸國法而警人心也哉除巡撫總兵等官翟繡裳楊四畏等候覆勘處分外叅照總督薊

遼保定都御史周詠才若通融器實鄙猥結寵權勢  
爭孤媚以殺人濫握鈐符縱虎兇之出狎當局而一  
籌莫展惟圖僥倖以爲功失機而百計支吾敢肆欺  
罔以掩罪所當依法重處者也鎮守遼東總兵官寧  
遠伯李成梁起自戍行越躋勲爵以邊圉爲谿壑而  
士卒時見凋零獵金紫於家庭而名器日滋冒濫公  
行賄賂無非巧於彌縫互相隱欺終莫逃於敗露所  
當從公議奪者也伏乞 聖明軫念邊防大計難容  
來自匪人勅下該部查果 臣言不謬將周詠李成梁

亟行究處以快公論庶賞罰有章積弊可刷而於安內攘外之烈不無小補矣奉

聖旨兵部知道

兵部覆奉

聖旨是邊事重大將才難得若大將盡忠奮勇替朝廷出死力的却誤信浮言橫加詆斥反不如避事偷安可免訾議這等是非倒置功罪不明何以服人心作士氣李成梁封爵照舊着益加奮勵勿以人言隳沮有負國恩馮景隆輕率妄言姑着調外任

邊臣禦虜不實朝臣謀國不虛懇乞聖明分別  
創懲以存重鎮以圖治安疏

胡克儉

巡按山東監察御史  
萬曆十九年七月

臣惟國之大事在邊邊之大弊在欺而一傳衆咻不  
使人言其欺則又欺之欺者也夫國家二百年來西  
款稱臣東戰報捷詎不稱盛哉然而非其實也款不  
以實則利歸于虜而害歸于民于國戰不以實則利  
歸於官而害歸于民于國其爲敗亡之道一也西今  
一敗塗地不可收拾已爲明鑒遼東軍民積困已在

危急存亡之秋海內三尺童子皆知之獨皇上一人不知耳及今改絃易轍猶曰七年之病求三年之艾已爲晚矣柰何尙踵襲故套以欺皇上而不欲言官之置一喙哉鎮守總兵官李成梁二十年來功次臣非不聞之甚詳知之甚的但旣經勘覆恩賚俱有成命臣不敢復贅故臣始至境人稱亦稱會薦亦薦未嘗求之以苛惟去年十月大舉今春閏三月出塞則臣之所親見者總皆故套總屬欺罔臣不容不申其說也如賊本不過五萬卽虛張其勢曰二十餘



萬賊本月二十八日出境卽先馳報曰二十三日出境臣初亦爲其所欺而以欺報今知之悔無及矣彼時一大營海蓋之兵併力而東遼瀋諸路之兵併力而西一夾攻之卽不能使無噍類亦可以殲其強半然而大將等統兵束手也如畏明之蝠藏之惟恐不密如驚草之蛇入之惟恐不深任其殺擄如秦視越不惟不肯對壘卽虜求一見而亦不可得矣聞賊笑曰好李小廝如何不敢出來和我耍吁大將如此餘又可知矣使其果二十餘萬以數日之久豈不能蕩

平全遼又誰阻之而令留寸土一民耶臣巡行所經  
伏屍盈野哭聲載道稍有人心者不忍見聞今殺擄  
姓名數目俱在臣手臣恨不能効一臂之力躍馬揮  
戈滅而後朝食問之咸云自成梁做總兵以來都是  
如此往年有副將曹簠好戰爲其所忌而陷之以罪  
今日誰敢一戰夫旣不肯戰姑存我軍士保守城池  
可矣奈何今春又圖冒功陞賞盡驅而死之塞外乎  
蓋今春徼呈上威靈全無虜犯聲息起自正安堡  
叅將郭夢徵稟帖到成梁曰哨得蓮花山至北沙圪

一帶達子皆稱水草便益住牧惟板升孤懸原無精  
兵看守雖是漢人然在外數年卽是達子乘閑料在  
此可盡殺來張功撫臣郝杰初亦不肯已與閫臣侯  
先春議罷及先春方離廣而杰不自由全師遂出塞  
矣黑夜襲殺二小營得其旄倪二百八十一顆回兵  
間有數騎達賊一呼李寧遂策馬先逃衆各棄甲曳  
兵而走原未交兵正因互相蹂踐與溺河跌巖而死  
及至離邊五十八里鎮靜市夷回又大肆殺擄以故  
數千之兵旋者不十之一二後三五日或七八日十

二三日赤身匍匐而來者數人此其顛末并失亡數  
目已蚤在臣手於是始捏爲腦毛大等入犯聲息並  
解功到臣臣既恨昨冬之不戰又見今時之議戰使  
真有戰功豈不樂爲鼓舞何至病狂喪心露簡以阻  
戰哉惟是諱罪邀功欺罔太甚臣公憤不容已故畧  
言其槩耳使臣言爲非則閱臣與臣書曰此番出塞  
爲罪斬獲非功此何以說也在按閱猶曰一體也該  
鎮按察使鮑希顏非身分其責者乎稟帖到臣此脊  
出塞鼓動者李寧其臨陣先奔者亦李寧也士馬損

傷得不償失言之可恨謹以失事情節及應叅官員  
上呈伏乞尊裁此又何以說也巡撫郝杰非身任其  
責者乎而罪寧自罪一疏蓋從來邊報之僅實者見  
此又何以說也得非皆以實之不容掩耶大學士申  
時行密勿不知邊陲昨孫守廉之叅始以書阻臣繼  
止稟聽勸臣嘆邊事日非不得其言扼腕成疾欲告  
未告今叅寧微及成梁又與許國各曲庇成梁謂不  
可以邀功抑之諭臣以寬文法臣謂邊方有事地方  
官互相隱諱與皇上通一線之脉者惟御史一人

耳故御史指實言之。皇上或軫念邊臣而宥之則御史盡職。皇上施恩斯爲兩得。若御史不言而自爲寬容是旣失職又市恩二者之所爲皆罪也。彼西事者豈非以當日寬文法而致然也。豈非以曲庇邊臣致然也。故臣謂近日邊事固壞于邊臣之欺蔽亦壞於輔臣之調停而言官得行其說則欺蔽無所容而功罪明賞罰當又誰敢不實心用事也。如徒知一將之罪爲當寬而不顧一路生靈爲可惜徒幸一時無事以爲安而不顧百年貽禍爲可慮則見小遺大。

謀近忘遠輔臣不報如是矣若大學士王錫爵本體  
然不渣但常以至誠之心而聽欺方之說每墮小人  
之術尚不知曰從來殺虜在所不免此亦自是偏護  
處成梁揚言曰大倉王恩府說渠在位一日我父子  
安心做一日總兵此言如無是成梁假虎威以嚇衆  
固爲可惡如有之是錫爵爲其所欺而不知也宜亟  
省也爲本兵者宜熟察邊情細分功罪朝題夕覆令  
邊臣有所勸懲可也乃尙書王一鶚不察臣疏所論  
何事惟襲套語謂臣曰遼鎮遇虜之旣入則先於堅

壁清野以固守爲功乘虜之未入則每潛師出搗以  
戰勝爲功此該部二十年來爲成梁題覆濫套一任  
千章萬牘惟橫此套覆之于邊事安克有濟況臣題  
在四月間言及該部移賞爲陞卽先覆之李寧等罪  
狀迄今數月不覆豈李寧尙無罪耶抑寧卽有罪王  
法不當問耶豈成梁之賄未到而姑有待耶抑成梁  
之賄已到而故爲留耶豈臣之愚直不便于覈勘耶  
抑候交代之後有望于新院爲之回護耶一事如此  
事事可知一邊如此九邊可知臣謂誤邊誤國者一



鶚也督臣蹇達徒負食粟之軀未有籌邊之策獨延  
頸望功屈指計廕一念嗜利獨爲惓惓四月初八日  
杰以功罪並陳疏往會稿卽駁回曰從來邊事只宜  
報功不宜言罪及杰執前疏以往已違其計廕之初  
心十四日晚堂答應官王敬名一稟曰李總兵差官  
老爺上進海參李如松以拾羸馱之金帛入尤中其  
平生之上願于是棄杰會稿而創爲一疏以患得患  
失之心而藉口于辭敘辭恩之說以飾罪欺君之念  
而駕言於憂邊鼓士之談豈杰親臨者不知其罪而

彼遙制者反知其功耶豈杰專任者不知鼓舞戰士而彼遙督者獨知磨礪戎行耶卽如曰遼兵出塞原有接濟馬匹二人常兼三馬則損人二百止宜損馬三百然杰原報損馬一千彼七百者又何以損耶欲掩而卒不可掩欲詐而卒不可詐誠所謂小人肺肝如見矣蓋杰猶忠而虛達實欺而狡杰猶清而正達實汙而邪矣且達自筮仕以來曾有一善狀乎如穎上如祥符皆臣里之鄰封與首邑也臣今往來其地士民之追恨者猶有蹇達不達十萬腰掛之謠故當

年以首邑而不與行取科道之選蓋公論也又以部  
屬陞轉京察追降知州亦公論也淹淹下僚無復尊  
顯之望矣及時行執政而達以同年之故善於夤緣  
遂得蘇松道缺 皇上試數蘇松道有一不爲開府  
者乎有一不以捷徑而借爲之地者乎歷冒今職實  
非其據當今邊方多事宜爲地而擇人不宜以人而  
誤地 臣謂如達者亟宜罷斥者也兵科左給事中張  
應登 臣素亦知識人謂轉兵垣之後納李如楨厚利  
而結爲弟兄 臣初不信但汰邊臣疏上成梁接邸報

喜曰好了。韓人已去了。訪之。則申維岱。劉葵。皆李如  
松。應登之劾。如栢暗使之也。臣不知維岱與葵  
亦何人。即使可劾。亦不宜爲如松作鷹犬耳。應登  
此疏未上。會與臣書。欲甘心于撫臣郝杰。臣復之曰。  
杰練達正直處鎮和而不同。錢糧加意節省。公論謂  
視前數撫獨優有官如此。似當曲成其美者。應登始  
止其說。今二紙皆在。臣不敢以應登輕信一節而沒  
其生平之大善。蓋成梁以不同之故。陰使應登而然。  
謂應登爲李氏鷹犬。非耶。臣奉李寧疏上。應登致書

閱臣令回護李寧而排臣之說閱臣亦人也目見其  
非安肯昧心至此哉尋於該鎮題本抄送到部又批  
其尾曰閱臣親歷覩聞必真本科原題欲候閱臣體  
訪具疏者有以也臣不知有以者以公乎以私乎抑  
以公濟私乎以私滅公乎果以閱臣之體訪而廢按  
臣之監察乎抑以閱臣之一手掩全鎮之耳目而箝  
按臣之口乎惟是成梁因臣言原無哨探襲殺屬夷  
遂密令郭夢徵于正安夷市誘夷人以石門花谷之  
富庶及官軍之無備指以道路令其搶擄以飭已遠

哨之功而見屬夷犯順之罪

臣

初訪知謂萬無是理

不數日而石門被虜實有是事矣

臣

始不能無疑及

訪當年遼陽付將孫朝梁者忠勇絕倫成梁忌其成功逼已令李平胡賄買馬市夷人專搶遼陽一日二次又密令備禦張棟中軍官沈其芝左計于內如賊犯南則支兵于北犯北則支兵于南俾成梁不得與賊合陣夫自己鎮守之地且教賊犯以傾人况石門乎賊中常借姦細爲嚮導况指以道路示以無備又聞其富庶而不搶乎成梁一日曾對

臣

曰今之若

門喜峯口二處惟不犯犯卽入矣由此觀之使令之  
情固然不然何二十年不犯今一旦犯耶 皇上可  
默悟矣於是應登題峯石門之疏卽曰偵探宜早何  
不以遼東之報虜聚捏留觀之也宜先擊以代謀何  
不以遼東字羅胡吉兒之捷觀之也一唱一和捷如  
響應臣不意應登甘附途卽至此然則由東征之疏  
觀之是利之媒而由石門之疏觀之是途之黨矣如  
應登者可令一日厠掖垣耶蓋成梁二十年來捷功  
皆在塞外見臣言出塞之非正中膏肓之病故百計

彌縫如此然其先也正結權臣以害言臣今又兼結  
言臣以排言臣則其計愈狡其錢愈神而爲之效用  
者又大可爲人心世道慨矣夫祖宗朝不增餉而  
兵足不報捷而邊寧今餉日增兵日寡捷日報而邊  
塞日益疲憊者皆以軍不見餉而財盡于侵剋伍不  
見軍而力疲于私役入犯不戰而出塞邀功之所致  
也夫往往入犯不戰輒以衆寡強弱不敵爲辭不知  
此一虜也豈入犯則強而據穴反爲弱耶豈入犯則  
衆而住營反爲寡耶此一將卒也豈入犯時束手者



出塞又皆能攘臂也無是理矣蓋出塞之役非惟名  
王會長之帳不敢遥望卽彼之真部落亦豈能得其  
一哉惟指西走東假張作李竊其鄰邊住牧數奴夷  
之首而已此在虜原不以爲有而在邊亦不能爲我  
利害者屠之原無異也然此猶曰夷人也若板城之  
住者與虜之所使住邊及擺撥哨探者被擄潛歸跋  
涉數千里饑餓數十日歷萬死一生而來者皆我黎  
民也一切殺之然此猶曰在外者也若往年懷挾之  
獎民謹曰帶着人頭去殺賊蓋新塋者不能保其墳

獨行者不能留其首慘酷尤甚又并其陣亡之軍一槩割首以報數如十一年冬賊犯十方寺史儒塗廣等原未交戰共割漢人首三百八十一顆行至浦河市人各識其面目劉監生奪數顆懸于鍾樓王團發覺其事御史陳登雲具本欲叅之撫鎮將儒廣細打求止特未報功今陳登雲在道可問而知也如十六年春剿那林孛羅攻圍不克軍丁死者以半又天寒凍死推車軍士數千因無虜功遂割死軍五百一十二顆報驗御史許守恩欲劾之而巡撫顧養謙以勢

挾而來止竟以報功余守恩在蜀可問而知也卽封  
伯之功亦出塞外前巡撫張學顏亦曾讀書者豈不  
知尹吉甫召穆公之爲何功豈不見李成梁之爲何  
狀乃虛張于疏曰視之尹吉甫之伐獫狁召穆公之  
征淮夷不知孰爲軒輊出此言豈惟良心已死且藐  
視天下無人敢于獨欺 皇上罪在不赦况恩威出  
自朝廷學顏卽據伯以請遵何例也蓋假成梁開端  
以爲奉承張居正封伯之地耳會典所謂邪姦小人  
擅作威福紊亂朝政者非耶抑學顏罪不止此嫉正

妬良鼓禍肆毒致前御史劉臺于死人知土宗載陳  
國寶之已伏辜而不知作俑者學顏成梁二奸也臣  
謂宜處二奸以謝天下忠義之士今遼人謂全鎮之  
生靈脂膏一殘剝于學顏再殘剝於李如松今如松  
爲民奪陰天理昭彰獨學顏漏網人尙切齒前巡撫  
顧養謙貪殘險惡視學顏尤甚圖陞賞而剿那林字  
羅全遼人財一空懷睚眦而傾王緘許守恩舉朝縉  
紳共爲憤恨郎中周文卿之稽查錢糧與成梁布散  
流言爲之中傷臣初出都門臣有授旨於臣者臣

出關知其盡心爲國方嘆服之不暇肯背公論哉蓋  
成梁與前後數巡撫惡其異已者卽擠之喜其附已  
姑容之鼓弄圈套魍魎橫行如前獲之功非我黎民  
則我軍士真夷才不二三又非其入犯之輩以此宣  
捷告廟則辱朝廷宗廟以此頒爵賞則辱王絲王綸  
故臣惟首功云者謂當場殺一賊首可保我地方衛  
我人民故云功也若塞外不知其何地所殺不知其  
何人如獵夫登山所得以野鹿死麕首則首也何功  
之有故臣敢以死自不犯之不可不戰而出塞之不

可復爲也臣敢以死請入犯之戰當盡恕其攻剽之  
罪而出塞之役當盡革其斬獲之功也蓋入犯而戰  
如全勝則可以寒彼之膽令不再來卽不勝而彼亦  
不得縱橫來之之心且緩若曰恐損傷軍馬則塞外  
何嘗不傷此皆懦將藉口不足信也不然今日聽其  
擄去官旣無罪明日殺來報數又以爲功民獨何辜  
而官獨何幸也此在今日救弊保民之所宜亟議者  
也故臣敢昧死而啓 皇上十九年之蒙蔽慰全鎮  
數百萬之冤魂存混在瘡痍想假之乎遺也夫二十

年以爲功而一旦以爲罪附和者多以爲功而

一人以爲罪卽

皇上或亦駭聽然

皇上不聞繁

言至大夫當烹之說乎成梁善于結納

皇上左右

皆伊之人

皇上深宮之事

臣

在朝數年不知者成

梁一一能誦之朝發夕知毫髮不爽

皇上不記李

材之通賄

長

鯨乎邊臣舉動大都如此願

皇上勿

以防邊大計問左右也

蓋遼左困極

臣

目擊心痛屑

屑乎興利而利不可興則以害之未除也屑屑乎除

害而害不可除則以未除其大者也故敬敘大害一

三月昧以陳伏惟皇上頓悟亟處則全遼幸甚國

家幸甚

臣

愚幸甚

臣

不勝惶悚待命之至



嶺海冒功疏

王德完

兵科給事中  
萬曆十九年十一月

臣待罪該科檢閱章疏該萬曆十七年七月十七日  
兩廣總督劉繼文爲稔惡撫賊叛亂非常仰仗天威  
督兵勦滅永銷嶺海妖氛等事奉 聖旨兵部知道

欽此內稱計擒叛撫李茂陳德樂施舉大兵進勦斬  
獲六百餘級瓊崖蕩平先於十七年四月二十六日  
繼文一本爲妖民倡亂旋即殲平撫散黨徒恭報地  
方寧淨等奉 聖旨兵部知道欽此內稱南贛奏報

新賊王子龍等兩廣擒賊李圓朗等不下百人南韶  
安靜并雷廉珠池之報在數月間稱大捷者三臣未  
嘗不壯之曰山寧海晏亦近世之殊勲也及細詢之  
粵人與官粵者則其上下欺罔之罪遠近屠戮之殃  
大可驚痛事于兵垣有難緘口臣請據所聞爲皇  
上陳之粵李陳二酋自隆慶末年就撫無異志復經  
按臣蔡夢說令其散處瓊城與編氓埒因遊擊沈茂  
索珠構釁遂倡議擒二酋二酋旣擒其黨二三千人  
遂挾要稱兵作亂該道孫秉陽不善撫衆將楊友桂

不善戢又不提兵阻截使黨徒下海襲城然寔以自  
免計耳文昌署縣事訓導林立乃報賊衆千餘以致  
秉陽張皇請兵于是繼文令總兵李棟督兵二千勦  
之及至瓊則黨散賊逃無可殺者而棟恐虛張先報  
反縱聽用把總楊壽殺掠良民首級充數而瓊民始  
大殘矣維時挨查排門分兵把守誣陷屠戮人人自  
危卽四牌坊學前後晚卽誘殺地方出首秉陽反怒  
而杖之人人不保首領聞衆兵夜行皆帶犀利鈎鑣  
取人首級於牆內泊大舟於白沙凡夜竊人首皆

藏之舟中每一首動支賞兵銀五兩積此首級又詭說賊名分坐各官項下因以報功且以謀利原疏稱零擒于原野正良民駢首就戮之案當時未嘗野戰而有功天使之自敗露也及舟師擒捕賊乃在白鴿把總陳震寔尸其功白鴿離瓊三百許棟惟坐城何曾一出海濱而乃攘臂奪之耶震懼棟不敢言功而心知城中舟中首級盡良民也亦切哀之計擒斬真賊不過一百有奇其漳全廣潮客族受誣死者不下百餘人瓊山文昌等縣竊殺死者不下三百餘人如

瓊山縣唐述王三胡允茂等家殺首失屍文昌縣韓  
賜乾王文明等家亦被殺首一時乞丐僧道襍居廟  
舖者皆失首死其他無主者不可枚舉婦人被害失  
首與指拇者甚多獨澄邁知縣吳如圭部官兵而全  
一邑餘府縣但出告示令民黃昏閉門而已不能禁  
也瓊海去京師萬里何自籲天按臣黃正色曾嚴諭  
未能禁止但勘功級未結從來按臣程達近欲直陳  
聞遷中止布按二司知之而不受訴贑州軍門受訴  
而不能行海道趙善政知且止之祇付竊嘆副使黃

時雨追悔迎合旋亦掛冠瓊民何辜罹此冤苦骨肉  
盡灰幽魂夜號怨氣沸騰愁雲黯慘臣聞之且爲流  
涕何兄目擊者此臣之不能緘口一也其在妖賊王  
子龍先經南贛軍門奏報據江西龍南縣稱報當陣  
殺死王新藩卽王子龍隨經兩廣會題奉旨梟示欽  
賞有差豈不謂子龍已死後踰數月惠州府通判蔣  
杞署和平縣事報據子龍未死差壯丁尾其舟密白  
所司擒獲并其妻孥兄嫂八人監候試其術能爲燒  
煉點銅鐵輒爲銀遂聞傳前稱陣亡者非子龍今則

真子龍也兩廣欲鞠以爲真南贛欲掩以爲非真躊躇久之後南贛移書兩廣并二司各道令子龍一死以滅口而兩廣亦謂事已報功業論賞矣遂行文惠州令拷子龍死知府孫光啓與其同寅訊之光啓拂衣退謂寅曰此非吾任也子龍生死在君輩遂稱疾杜門堅意乞休其意蓋曰前報子龍亡者僞也今獲真子龍匿而不以報者欺也果真子龍耶當聞之朝宁明正典刑豈遽令暗昧而死果非子龍耶則無罪人也何忍置之死二者皆非吾所能爲然一露而失

兩軍門意又無以報命非引去不可既移疾杜門軍  
門銜之而按臣以爲真疾也遂聽其去臣訪惠州諸  
縉紳皆謂光啓正大光明愷悌愛養下車未幾已著  
賢聲而又少年強力何疾之有脂車之日謂人曰直  
道而事人焉往而不三黜此其志節有過人者不然  
十年科目三月黃堂非有不得已之情孰甘盛年高  
臥而光啓旣去繼文復授意署篆者竟迫于龍死此  
非以僞爲真卽以欺飾僞非蔽一元惡卽殺一無辜  
在郡守尚不忍于孤囚何大吏反甘心于太守耶此



臣不容緘口一也臣聞曹彬下江南不妄殺而其後

寢昌王金斌所至屠戮而其子有乞丐者則妄殺之  
報昭然也今興兵勦賊正欲安民乃至玉石俱焚而  
且殺民以充賊真膺罔辨而又殺人以媚人當時將  
吏尚謂有人心乎臣訪得聽用把總楊壽恣睢殺掠  
爲罪之次兵道孫秉陽坐視殘傷全無惻隱賊牧重  
賄卒至沉舟罪亦不在其下始則遊擊沈茂索珠爲  
之貽繼則叅將楊友桂玩寇爲之助又訓導林丘虛  
報爲之驅而通判劉世懋經歷吳應徵乘時圖利豪

俠林璧王大斌千戶吳紹周屠戮武號嚇吞鹽壞人  
至今切齒此皆罪之無所逃者也然臣爲督撫劉繼  
文罪尤浮于諸將殺掠雖非繼文使之無知妄殺而  
不一懲且爲之庇者繼文也子龍奏報頃自南贛始  
之然知其復獲而又不以聞且致之死者繼文也而  
其貪婪尤有可恨者蓋粵中除養兵外橋津關隘稅  
課而南雄廣肇潮州等處所解軍門每處不下二萬  
繼文皆沒入私囊潛行媚結商困民怨若周聞知各  
將領司道等官明受餽送公行賄賂如領級報功量

入其貲多寡爲差營求薦舉所得不下數十萬教官  
林立後爲臨高知縣至酷也受其千金許爲行取而  
格于公論猶曲庇援救東莞知縣董兆麟惡貫滿盈  
受其二千金潛許薦揚而迂知敗露僅爲議調卽前  
叅南嶺遊擊陳策亦謂其虛投手本旬日孔方未到  
怒而傷之且藉一人以掩衆目人言嘖嘖誰其可欺  
新會湯炳林權鄒龍等時號六強暴則寄以心腹妄  
揭窩主誣害善類付筵筦順新香所獻亦不下數萬  
四五公子絡繹往還滿載金珠沿途騷動頃未離任

先發行李八十餘扛過梅嶺人人吐舌其摻括隨行  
又不知其幾也夫繼文草菅人命朘削民財罔思怨  
氣之彌天不顧肝腦之塗地貪殘彰彰如此尚可令  
覲顏而首司農之列乎伏惟勅下兵部轉行廣東巡  
按御史親詣瓊城查勘各州縣被殺良民若干并各  
司道將領官罪狀輕重及惠州王子龍擒死真偽原  
由從實奏聞定罪毋得畏避阿縱仍乞勅下吏部博  
采公評題覆亟將劉繼文罷斥以爲人臣貪殘欺罔  
之戒至惠州知府孫光啓告病回籍亟宜起用則寬

魂雪而公憤舒貪吏退而循良進誠風勵寰海之大  
機也然臣猶有慨焉西北畏虜之強每重言戰戰不  
可克則以屬夷邊氓爲首功如諸臣所論遼東之虛  
冒以爲九邊將帥之故套皆然是西北之民外苦胡  
虜又內苦將帥也東南利寇之弱每狎言勦勦不能  
多則以商販貧民爲首功如臣所聞瓊之慘毒恐諸  
蠻夷若楚蜀滇貴廣西間凡以功聞者其出於不得  
已固有之然生事要功者十常八九蓋裨偏非此無  
以覬超遷大將非此無以悻殊賞督撫非此無以樹

功名媒私廕故東南之功虛報而邊郵愈不安民生  
愈不靖皆貪功枉殺者罪也夫匹夫匹婦冤情所結  
尚能干天地之和况數百無辜意外之死乎伏乞  
皇上恤憫黎元申飭疆圉文武之臣毋畏虜而虛張  
首功毋利寇而動輒生事庶邊民得安其命而覆轍  
不蹈於前非矣

經畧大臣流言惑衆大負國恩懇乞聖明亟賜  
罷斥以絕誤國之萌并乞專責督撫之臣悉  
心任事以伐虜謀以安邊圉疏

徐宗濬

山東道御史  
萬曆二十年正

臣接邸報該兵科都給事中張棟等一本險媚梟臣  
懷詐反覆乞賜重處以伐邪謀以壓羣聽事內叅神  
木兵備李杜以必戰媚督臣魏學會以不戰媚經畧  
尚書鄭洛以李杜稟帖寄示朝紳倡言惑衆謂魏學  
曾所報斬獲明安首級一顆及虜賊首級四百五十

八顆多係守口夷人不宜冒功等情

臣

不勝駭異不

虞鄭洛妬功嫉能負國欺君至此極也先該洛奉

命經畧西邊集七鎮之兵齎三十萬金以往頓兵不

戰

臣

以爲洛素習虜情是行也非萬全不謀非百克

不聞必將馳至金城圖上方畧如趙克國之破西羌

也必將厚賞士卒沉幾謀虜如李牧之破匈奴也已

而逾年矣卒未聞有必戰之志而論洛者且紛紛至

焉天下始於是乎失望而臣始不能無疑焉私計之

曰洛非能決勝也戰亦非能決勝也厚遺闕氏則有



陳平之計始終主和則有秦檜之謀交結虜婦重賄  
播會要結歸巢權紓邊難洛之技正此矣何也古之  
善用兵者相能將能故足以成功當時元輔申時行  
談虜情則錯愕失詞論戰事則震恐失色帷幄之中  
已無足恃非魏相之笑也尚書鄭洛倉卒出邊聞將  
不及千員猛士不及五萬而欲驅疲散之卒橫跳強  
胡斯已難矣非充國李牧之師也何使不量力而輕  
鬪則勝負之形不待臨陣而已決矣臣故策洛之必  
出於和而洛之所以報 皇上者張皇水泉莽川二

戰侈談椿曾歸巢大功而火曾跳梁比之空天一鳥  
大海一鱗以爲不足較也斯以爲經畧事竣可以復  
命云爾然臣不敢過責於洛者以爲洛雖不能與虜  
諸亦其自量則然至於督臣魏學會撫臣葉夢熊志  
滅強胡忠期報國真空谷之足音洛雖不能自爲宜  
聽二臣爲之也今魏學會報斬明酋首級一十一顆  
虜賊首級四百五十八顆此百年以來未有之事雖  
虜之報復尙所當憂然稍洩中國之憤大振三軍之  
氣此亦足爲之兆奈何洛欲以浮言壞之此其心何

心哉不過曰洛言當和而學會則言不當和洛言不當戰而學會則言戰乃能勝謀既相反功又相形洛寧不內愧於心而外何辭於衆口乎此所以乘學會之報功而必欲毀之也嗟嗟洛之立心如此則欺君誤國之罪可勝誅乎何以明其然也前歲洮河之禍始於二十年之和廟廊之臣如處堂之雀邊圉之士如出狎之虎將卒情脈而不可用甲兵朽鈍而不可操一敗塗地幾不可收拾非二虜酋之能勝中國實中國之有敗道也陛下赫然震怒命將出師分遣

科寺諸臣臨邊閱視搜剔弊蠹分別處治是天所以  
開陛下將使深懲往轍轉弱爲強雪恥除兇申威  
沙漠使天驕頽首永固邊陲正惟今日而魏學會等  
又能仰承德意專主治兵痛絕和議雖不能無勝負  
未必之虞而自強則爲中國必勝之策蓋我能戰則  
守可固和亦久制人而不制於人孰與夫金幣媚虜  
愈賞愈捨坐而自困之道哉洛不深爲國家久遠之  
計而欲效秦檜之術於陛下偷安旦夕貽禍將來  
萬一其效見於三二十年之後洛雖死何足以謝

陛下哉臣故以爲洛之妬功其害及於督臣而其惑衆亂聽終執和議其禍必及於國不小也陛下所以用洛寵洛恩至渥矣而洛以此報陛下終於誤國臣故以爲洛宜罷也然臣以爲專任督撫二臣責以成功者何也蓋捨會莊明等虜所致不過貪漢財物非有英雄特異之資譬若大羊然畏之則愈驕一創之則遠避矣今縱不能盡絕市賞然必限以定數之內無所更加則循例給賞數之外有所過索則稱兵誅夷夫有財物以中其貪心則不能不戀我有兵

威以折其雄心則不能不畏我而所以能戰之具則  
簡我將吏訓我士卒足我糧食繕我甲兵修我封疆  
守我要害審我機宜明我賞罰以決戰爲本以市賞  
爲權虜不足畏也魏學會等有見於此而誠足以將  
之才足以赴之是陛下腹心之臣也可不專任之  
乎伏乞勅下該部再加查議如果臣言不謬將鄭洛  
亟賜罷斥魏學會等專任責成則浮議不惑而邊圉  
可安矣然臣有說焉今時之弊莫大乎是非不明功  
罪相操直已守道者雖有功或以被讒鑽刺彌縫者

雖無功或以見賞此姦邪所以擢臂而烈士所以撫膺也陛下自爲社稷計誠於此洞鑒而致慎之天下幸甚臣愚幸甚

東征功罪當持大體以勵人心疏

楊東明

刑科右給事中  
萬曆二十二年正月

臣惟國家役使臣民與臣民樂爲國家役使者有大機焉曰賞罰而已故士有捐身家冒矢石棄性命于須臾者非其愛生之心與人殊也前以利賞後以懼罰其勢不得自愛耳故王者不出皇序而能得士人死力樹功邊徼者執此機也如功罪不明賞罰不當無論當事灰心解體而後來者且視爲殷鑒卒有大難誰肯竭心力自扞文罔哉頃者倭奴狂逞蹂躪朝



鮮虜其臣民奪其郡邑大張聲勢意圖內侵誠天誅  
所不赦者 皇上弘恤小之仁奮伐暴之勇以經畧  
付宋應昌征勦付李如松二官奉 命而往遵旨而  
還論二臣者紛紛靡定頃悉 明旨目今四方多事  
朝廷之上必須功罪明白方能使入這本着吏兵二  
部會同查議宋應昌李如松是功是罪從公據實來  
說欽此是諸臣之叅論與 明旨之會議非有成心  
無非核功罪之實持賞罰之機而已 臣切思之此事  
係朝廷勸懲之典係九邊將士觀望之心又當時事

多艱策勵人心之際不爲二臣計當爲國家計也臣  
安可徇衆論之同昧獨見之異不揚眉一吐其愚乎  
謹按東征之事有失利之罪亦有克敵之功夫失利  
之罪小朝廷用人當存其大畧其小錄其功赦其罪  
是所謂持大體也檢髮而櫛數米而炊是有司細事  
豪傑笑之當朝鮮之畏倭遠遁也所不失者全羅慶  
尙兩道耳今一旦舉故土而盡復之將謂朝鮮自取  
則望風而逃者必不能完壁而有將謂倭奴自退則  
力戰而得者必不肯棄利而歸非麗人之自取非倭

奴之自退則是功也豈一無所歸哉且二臣之功可  
無論而從征血戰之軍士可不酬其勞乎陣前死敵  
之幽魂可不恤其後乎不酬其勞不恤其後是朝廷  
自今以後不欲復使一人如酬其勞如恤其後則寧  
可念追逐之功而忘發縱之力乎臣反覆思之欲不  
錄敘二臣不可得已然臣有以責二臣者二臣亦不  
得辭焉當應昌旣取王京也宜的據情形明報天子  
如倭果可剪則當爲乘勝長驅以成破竹之勲倘勢  
不能爲則當謂臣力已竭宜別選代庖之將柰何計

不出此倭未歸也而詭云盡去川兵未見殺也而詭云亂民且謂倭衆往來難爲確報夫一確報不能尚可毅然稱經畧乎今都人士總不知倭之兵馬若干數目倭之糧餉若何轉輸倭之盤據意欲何爲倭之乞款有何指據憑沈惟敬之遙語執平行長之游言廟堂不得真情軍士無由藉手覲全勝之賞忽後事之圖應昌不得辭其責矣如松之從事西寧也臣聞其冲鋒陷陣收退虜之功乘暇先登焚巢之蹟綽有戰將之風矣第賊所括民間財物甚厚如松悉取爲

已有輦載而歸寧夏人皆得而言之古大將了當公  
事回還篋中惟圖書琴劍者豈若是乎平壤之戰力  
拔堅城碧蹄之兵得失相半臣亦爲如松壯也第縱  
恣我軍掠取朝鮮財物朝鮮被慘不異倭人古大將  
秋毫無犯卽取一笠必斬以殉者豈若是乎故謂如  
松爲戰將則可謂其爲廉將則不可謂有戰勝之功  
則可謂有節制之兵則不可如松應難置一喙矣臣  
誠愚謬謂應昌之功宜錄也因其塘報含糊或伏隱  
禍姑以薄報其功如松之賞當明也固其兵無紀律

貽怨麗人姑以量行其賞其他諸將領諸戰士諸陣  
亡之卒宜速加精核厚行賞賚生者酬其本身死者  
錄其後裔庶慰前人之忠義又圖後日之歡心然今  
日之罪二臣者多謂倭奴結聚春汛可虞假封貢成  
僥倖之功啓釁端蓄無窮之禍諸臣遠慮悉屬忠猷  
臣則謂此當視簡書責望之初情而後可爲二臣功  
罪之斷案非難決之疑也如必欲縱橫金山俾無噍  
類驅除一旦杜患百年國家且將自屈其力韓白亦  
難遽效其能臣恐斬二臣之首無以服二臣之心雖

然猶有說焉昔趙子雲無尺寸之功而漢高輒捐四  
千戶之賞誠謂吾不愛爵土則人不愛死生勵世磨  
鈍全在于此昔東南倭患之烈至今寒人心膽胡宗  
憲一舉而平之而卒從吏議身死牢獄豈不寃乎頃  
者劉哱之變朝廷亦嘗示帶礪之封懸萬金之賞矣  
總督葉夢熊壯懷激烈身請平賊賊平之後卽一尙  
書銜吝不肯予委曲艱關剪賊羽翼卒成內變兇戾  
兇元周國柱之功婦人孺子所知而僅僅世以指揮  
使國家之待功臣非徒寡恩蓋亦不信之甚矣

豪傑之不爲用也今宜亟敘東事諸臣之功并錄用  
宗憲之後於夢熊國柱易其封而侯之更於巖穴懷  
奇之士破格擢用毋若書生膠常襲故拘擥於毫髮  
間則海內英雄有出而爲 陛下了倭事者矣



東征功次敘錄當議謹循職掌陳芻見以重大  
典以昭大公疏

吳文梓

兵科都給事中  
萬曆二十二年七月

臣等頃接得兵部尚書石星等一本爲查核東征功  
次仰乞聖明酌行賞罰等事奉 聖旨朝廷爲島夷  
陷沒朝鮮命將興師三戰功成全復與國樹我藩籬  
前後斬獲首級一千六百餘顆功可嘉尚你部裏還  
當先請告廟宣捷以慰 祖宗之靈着擇日來看待  
告廟後通行敘錄陞賞不以再行查勘欽此 臣等閱

之相顧而謂曰賞功重典也今日三戰將士之查核  
確矣謂宜賞以示勸矣乃經畧等之槩錄無乃猶待  
勘議之爲當乎夫利印難與圖大敝袴必待有功故  
功而不賞則爲屯膏賞而不當則爲濫予兩者皆過  
也今平壤三戰之役諸將士遠涉異境蹈白刃爭先  
赴敵以建此功蓋自有足多者卽賞予踰時猶以爲  
晚况經按臣之勘覆則下無偶語之缺望上有大資  
之殊典豈不令將士感恩馳驅而望風畢命乎然此  
王京以前事偏裨以下功也今奉明旨通行叙錄

等寧不知仰體廟謨以作任事者之氣哉顧事關職  
掌終不容默默而不一言也夫經畧提督贊畫諸言  
者之指摘蓋亦灼然於聖鑒矣故今日之尚未敘及  
非誠如部議所云當敘而特有待也良以主使持籌  
難與偏裨並論耳蓋諸將効追逐聽指揮者也凡獲  
一級畧一地皆可以計勞言功若主師有發縱指示  
之責故不令小勝不徇小挫苟計非萬全不可抵乃  
績如爲山者一簣未成九仞盡棄如棋者一着不到  
滿盤皆空終不以一擬而遂苟且了事也今東征究

竟耳目難欺金倭未歸川兵未撤小西飛未還經畧  
特遣識者方附膺扼腕恐其不可收拾深切杞憂卽  
凜凜明旨曰倭情變詐未可遽稱事完而一旦飲至  
策勲恐非所以示勸懲聳聽覩也臣謹按東征始末  
而評論之經畧諸臣功罪自不能相掩者夫倭奴侵  
犯屬國虔劉其人民陷沒其疆土人將謂不復有朝  
鮮矣乃今旣云恢復則八道豈能自全狡夷豈能自  
退王子陪臣豈能自歸以是而不謂之功固無以服  
諸臣之心然牽制於封貢之議朦朧支吾自誤事機

師老財匱了無結局卽是以罪諸臣則諸臣百口何辭方平壤之捷平行長業以困重圍中矣於時號令三軍鼓行而前誰爲堅者則繫頸碎首直旦夕間耳乃解圍而縱之去是封貢之說誤之也王京以病疫而退倭衆業在掌握中矣於是犄之角之復躡其後則執訊獲醜可唾手得耳乃嚴禁而莫之追是封貢之說誤之也迨倭返釜山則病已小愈務在絕根奕之將終便宜多策要必奮揚威稜杜遏釁隙明告君父班師言旋豈不庶幾盛事奈之何往來講和遷延

經歲曾未驅一倭擄一酋而乃坐損金錢糧芻數十萬士馬死喪千數百則中國之虛耗日甚而遼東之供億迎送尤所費不貲閭里之蕭條行伍之虛弱有由然矣以故虜乘空而入迄今殆無寧日拒虎進狼之喻真可慨嘆此封貢之說始終誤之也故督臣顧養謙之疏曰東事失策救敵無能夫人臣爲天子宣力疆場而失策於前令代者以爲敵而莫能救猶然徼殊恩異數無乃太濫乎統而論之復將亡之國而歸之朝鮮或難以罪掩其功當可爲之會而欺誤自

敝何至以功而盡掩其罪此臣等謂將士之勞勩非速敘則不勸而經畧諸臣之敘錄非速敘則不定者也况先是奉有明旨着吏兵二部會議未覆二臣功罪未明且各役紛紛告有續獲首功未審的實若不行查勘遽爾通行優敘則續後首級真偽無懲何憑陞賞陣亡人數多寡莫辨何憑優恤無論不厭衆心其如國家名器何伏乞勅下吏兵二部作速從公勘議或令遼東巡按據實奏請以俟 聖裁則不僭不濫而大典公以懲以勸而人心服矣

西陲事急勢危督臣謀疎心狡懇乞聖明亟賜  
議處以快輿情以肅邊防疏

劉仕瞻

兵科給事中  
萬曆二十三年四月

竊惟邊患莫大於西北責任莫重於督臣其陳師旅  
也貴有萬全之謀其終付託也貴置身於死生利害  
之外斯古所稱重臣之謀國也者臣本謏劣不諳大  
體伏蒙 皇上拔置擢諸兵垣臣自到任以來卽於  
本科細閱近年章奏及兵部題覆陝西斬獲功次擇  
日宣捷等因臣不勝駭愕且職掌攸關不容嘿嘿謹



以總督陝西三邊今陞南京工部尚書葉夢熊輕敵  
召禍倖得脫身不恤國事種種罪狀爲 皇上陳之  
方夢熊之始而巡撫貴州也播酋雖干憲紀實無反  
形事在一調停間乃不勝倖倖必欲引繩批根致兵  
端一啓而靡可究結此其不滿於人者一旣而改調  
陝西也不奉明詔擅募苗兵當時科臣王德完已疏  
劾之矣又數倍增餉致甘肅官軍忿激思變幸寧夏  
之變先告乃假討賊之名以脫虎口竟也苗兵遇敵  
無一生還此其不滿於人者二及其事至寧夏也決

水灌城摧折虜鋒皆先任督撫諸臣部署已定夢熊  
惟以高坐靈州坑降屠城而已此其不滿於人者三  
借曰寧夏之功不爲盡無然皇上不次之遷世廕  
之典亦已賞浮於功矣曾不以此時拊瘡痍繕城堡  
勵士馬治餽糧致令兵日以損而不得補餉亦日以  
廢而不得加沿邊諸鎮元氣索然盡矣於是虜衆蜂  
起斬關直入卽有麻貴之截殺庶幾延鎮下馬關之  
兩捷然大勢莫支長驅固原蹂躪內地幾至餘月其  
間人民之虔劉城郭之殘破牛馬衣糧之搶擄蓋二

三千里之間爲之一空而僅僅委之於蕭如薰之不  
戰姜直之失守此固可以服二臣之心而塗千萬人  
之耳目乎此其功罪之較然者人人能言之也又不  
必詢之人言卽夢熊自効一疏蓋已自謂奉職無狀  
疏於計閤於事而甘心誅斥矣且兵不足以任干戈  
餉不足以供戰士亦夢熊之所爲自効者也乃忽焉  
而遂以捷聞豈夢熊神謀天授一旦兵不練而自精  
餉不增而自足乎無亦鼠竊狗偷聚其殘騎零虜節  
爲一朝之獲以逞其誇誕不經之故智乎兩疏具在

前後矛盾卽夢熊靜言讀之亦有不能自解免者矣  
夫斬首百餘而宣捷此功令也宣捷則必賞功曾謂  
功可賞而罪不當問乎卽使延綏之功毫髮皆實然  
亦麻貴一將之力也一鎮之功可以蒙賞三鎮之失  
事猶可置之不問乎麻貴之功可上逮於夢熊夢熊  
之罰可下貽於蕭如薰與姜直乎所謂兵以誅大爲  
威賞小爲明者不如是也臣再考督臣之兼官也始  
而侍郎旣而右都而尙書而宮保秩以漸崇而官無  
改無非欲重其權而久於其任惟是筦樞有缺則擇

其資最深功最多望最重者入而典之乃夢熊之在  
鎮二年餘耳而遽遷何其亟也遷不必本兵又不必  
止部譬之窮鳥投林不暇擇木胡爲是急急也始而  
睹其利不睹其害而以卽鹿爲奇謀旣而避其害又  
以趨其利而以速飛爲上計夢熊之貽害於後之督  
府也猶然其貽害於蕭如薰姜直之故智也使後之  
爲督臣者如夢熊其人將踵前轍而席不暇煖乎使  
九邊之爲督撫者皆夢熊其人將亦望隣境而人無  
固志乎

臣

竊爲夢熊者不忠於君不終於事不可不

顯斥以爲狡焉亂國是者之戒也如果臣言不謬伏  
乞勅下兵部將宣捷之舉速爲停止而但賞麻貴之  
功再勅吏部將夢熊議處無惑人心仍乞體念西鎮  
大壞極弊專責新任督撫無襲故套大加整刷以固  
邊圉以護神京宗社幸甚蒼赤幸甚

論虜王受封疏

吳允中

宣大巡按御史  
萬曆四十一年正月

題爲備陳封事機宜仰俟

廟堂採擇懇乞

聖明

勅賜議行以尊

國體以固疆圉事

臣以至愚極陋

謬局宣雲之役受

命以來蚤夜冰兢竭蹙抵關延

見吏民廣詢博訪凡士馬之登耗城堡之修頽吏治

之勤怠民生之苦樂某處扼險可以防守某處地便

可興水利某邊喫緊宜併力先完某處逼近宜併堡

爲一種種有關地方大窾會處且訪且錄漸有頭緒

獨是虜封一節原不難處惟當虜人具結之日輕報  
輕信封使久候成命難收故今日最難區處耳  
事已至此國體欲尊國本欲固謹嘔心泣血謬  
爲一得爲我皇上陳之虜酋封王原非祖制也  
成祖三犁虜庭其於北虜禽獮而獸畜之後夷氛漸  
惡正統乙巳之變嘉靖庚戌之警幾危宗社迨隆  
慶虔劉汾石之間地方荼毒慘不忍言幸天心厭禍  
孽孫歸附俺酋以舐犢之愛稽顙稱臣曾婦三妃子  
感朝廷浩蕩之恩輸誠納款三經易封始終不肯



寒盟本婦訓護之力居多也今本婦物故而上素二  
曾互爭家事說者疑虜不肯受封臣以理勢度之  
曾之受封也非徒享榮名也實欲貪厚利也虜不  
受封衣毳食腥蕭蕭然一宴會耳自一受封而  
享用霄壤矣臣初不知其顛末惟就撫賞一冊言之  
皮張則有虎皮豹皮貂鼠水獺等項段疋則有蟒段  
金段剪絨遍金等項珍寶則有赤金白銀珍珠等項  
覆蓋則有黃改機傘藍傘棕帽等項鋪列則有紅氍  
毹花毯紅毯等項騎飾則有紫漆鞍有鍍金鍍銀鞵帶

鍍銀轡鐙等項日用器具則有銅鍋鐵鍋高茶次茶等項甚至瑣屑女工之需無不精巧畢具嗟嗟窮天罄地珍奇瑰麗之物令人目眩心搖者一旦輦輸於窮荒之虜何怪名正者欲一槩鯨吞而雄據者垂涎不釋也昔人常嘆宋竭天下之力以事夷人臣近閱撫賞一冊輒涕泣爲之沾襟特近日所稱遵者撫賞二字耳然亦竊常慮之宋史載夏王病戒其子曰吾族三十年衣錦綺此宋恩也不可負元昊曰衣皮毛事畜牧蕃性所宜英雄之主當似王耳何錦綺爲果若

此則撫賞無所用邊事大可慮矣此固籌邊者不可不知而以今觀二酋尚戀芻豆之牛馬也其心未常不欲封也夫虜旣欲封而耽延至今者何也蓋以往年講封虜中兵權在三娘子掌握講說一定便無異詞而摺會一故則不然素酋係三娘子愛孫而卜酋以枝派爲群酋所附中間情形大費區處迨卜石兔四月到邕而六月忠順物故在素囊倚嫡孫之親以旣不得王子之號須據忠順之有而舍榮名以享厚實在卜石兔憑名分之正以旣受王子之封應擅忠

順之利而貪榮名又圖厚實兼以五路狡黠明暗陰  
狠而中國亡命如計龍計虎等又從而鍛弄其中  
欲增於舊例之外故倏喜倏嗔犬羊常態原不必急  
一時中外所共慮者獨以朝使久稽君命委諸  
草莽重辱國體而臣一腔赤衷更有食不下咽者  
第聞夷狄之性譬則禽獸投其欲則搖尾乞憐拂其  
意則狂獬反噬爲中國詰者惟當因所欲而節制  
之固非可以禮義馴服紀法繩束者也嘉靖中北虜  
求貢僅僅貪賞賚邀市之利耳邊吏倉皇無策主計

者爲謀不遠斬其使以彰國威于是黠虜憤恨蜂擁大舉二十餘年迄無寧日則往歲失計之明驗也今日封事操縱機宜實邊疆數拾年安危所關而未可以易言之也臣竊念以龍章紫誥下及腥羶其朝頒夕領也奚足爲國榮其耽時延日也奚足爲國辱惟以國家有大體邊臣荷戈旣不能制夷人之命待皇仁委曲而尚不能約束就命則平日修備謂何故待瀆法欲嚴此所宜責將吏者也皇恩如天地狂犬張口待哺而偶相吠相齧投之以骨不

顧亦直任其自定而已故待夷法欲寬此所以處二  
會者也嚴則久玩之人心知倣寬則喙息之狂犬知  
戴况 朝廷此舉原爲寧謐邊疆而今日之封且勿  
急事之成與不成惟問邊之安與不安而已虜封未定  
而果統馭無人也零夷鼠偷也大衆蚕食也我之性  
蓄被其擄搶也我之城堡被其殘破也我之兵馬人  
民被其戮殺也此政剝膚之患緩之恐爲心腹之憂  
勢不得不急今日虜人自爭家事自相戕傷實 中  
國之利也一聽其自處自分而我總不任德任怨說

者欲收兩虎之利而臣竊以爲兵家知彼知己無奈  
我之非卞莊也說者欲擇強而附而不知堂堂正正  
自有中國之大體况漢過不先而各邊諸夷聞之  
且生心耳故今日之封在我原不必急而惟念及  
封使則口雖不言急而心未常不欲急赫赫皇命  
久稽辱國體收回亦以傷國體千萬籌度訪之  
中外愚臣無所知識惟仰藉皇上寵靈就其嗜利  
之心以折之則局不難結矣往例封事一成併節年  
市賞僉得補給故虜人慣爲得計今年封事不成今

年市賞自在明年封事不成明年市賞自在夷心無  
厭肆爲要挾得寸則寸且以寸爲例得尺則尺且以  
尺爲例明知寸尺不可得而姑爲耽延以徼倖于不  
可知此夷人之敢于謾 中國亦 中國之自失其  
把柄也故 臣願 皇上嚴勅諸曾旦夕就封姑照往  
例補給市賞以示 王者無外之仁再或延遲敢負  
國恩則閉關謝絕卽或堅意乞哀亦止給當年 恩  
典而節年舊例盡爲革絕則不惟曾首憚失厚利卽  
諸頭目亦且奪魄相與慙慙蚤定矣脫夷欲不飽而



猶然耽延則亦惟有就市賞之利以夷攻夷而已聞  
虜自款貢以來所得 中朝金帛有名頭目照例給  
分而一切羣醜不得絲粟之恩且慕且恨久矣虜果  
抗 旨要挾我明白令通官傳諭十二部落各照界  
許自開市而部落中有輸心內附者入邊先厚加犒  
賞仍計口給以雙糧一切斬獲首級悉照 中國舊  
例總之以一歲之市賞結彼部落之心將芳餌一懸  
萬尾畢集虜酋縱狡縱悍而目擊衆叛親離未有不  
爲之膽落者膽落而哀請則與之始可久也漢一中

行說足以釀亂而世廟時以趙全爲邊疆大患二十餘年今用事虜中有名姓可指如中行說趙全類者固難以屈指計也每念遠託異國昔人所悲兼以胡地玄冰邊土慘裂而我華人拋鄉井離墳墓背却骨肉生禮義之鄉入侏僂之俗甘仰夷人鼻息者或迫于饑寒或由于亡命或以跡弛不羈之才困于奴隸無由以見奇不得已至此今誠開歸化自新之門窮迫者安插以生產註誤者湔洗其往愆而有長駕遠馭之畧者授以把總名色使得展布果革面革心而

捐軀報

國漸次優擢總無所限既動之以良心又

撫之以厚恩將中行趙全等復歸叛圖而可以塞其  
耳目可以絕其嚮導且斂弄無人而梟性縱曰難馴  
未有不悍然悟者矣且自互市以來中國之貨物  
亦自視爲珍異而中國之享用亦服習爲甘美縱  
或段疋皮張之類彼或有蓄貯尚可以緩求至如飲  
食之類有一時不能離者彼既負恩我亦嚴禁各  
口有以漢物爲市者如違禁下海者律則彼日用無  
惜如牛羊乍失芻牧而乞憐求欸者當接踵至矣夫

由前一策是謂折虜之心由後一策是謂破虜之膽  
而招漢人禁交易事雖近瑣屑亦與虜人大不便者  
也且夷地之好人總內地之奸細由廟堂以及邊  
境動靜呼吸備悉報虜每操之以爲關鍵今日以  
使臣久稽直空言講急則彼愈藉口以封事一成當  
有廕賞邊臣爲榮名而不得不急封事一遲當千重  
典邊臣以畏禍而不得不急邊臣不得不急而被無  
所忌憚則愈急愈緩以爲要挾之媒臣願皇上以  
封事責成督臣併以封勅恭藏督府明示二會以

此番舉動不問日之遲速惟問事之當否夫我有四  
策旣折其心又落其膽旣剪其翼又絕其用而廟  
堂之上又不以延遲罪當事則彼知要挾無所用亦  
不得不急彼不得不急而我從中從容裁酌理論勢  
屈旣以結目前之局且以紓異日之患則國體以  
尊國本以固而可以保數十年無事矣是役也中  
外共憂其遲而臣獨恐其速何也誠計不才將吏前  
有所垂涎後有所畏憚以速成爲奇貨而剝軍命以  
填虎吻當無所不至也今日封事中外願其旦夕成

而臣惟恐其速而不可久何也卜會名分足以統羣  
酋而卜會才智不足以馭羣會中間主特擁戴卜會  
者獨五路耳然五路已老矣今日受封之始不令  
安排布置各無異心而止畏遲延之禍苟且媚虜掃  
却燃眉直令當事將吏轉換支吾卸擔而去竟以難  
端遺之後人將來又費一番唇齒庸懦者襲舛承訛  
仍舊苟且之計公忠者清查整理定遭狂噬之變此  
皆事理之必然者也故臣任事三十餘日嚴察諸將  
吏以三王舊例絲毫不加爲主而封事遲速且未敢

言直以看後之結局何如耳近接大同副總兵張萬  
邦參將閻正名總兵王威等塘報有謂卜曾帶帳房  
一百頂往來搬移二程五路差夷往來會事不絕者  
有謂素曾母子俱病卜石兔在山後與素囊兵馬互  
相搶傷者有謂卜石兔差好人啞啞兔等四名在五  
路商議封王在正月十五日後赴邊等候各部齊日  
受封者虜人狡猾萬狀未可憑信而誓諸將吏  
今日封事旦夕就緒臣報主上不以為勤遲延時  
日臣報主上不以為惰巧塗支吾套結通官椎三

軍之隨博一日之勲者人以為幹濟臣以為罪魁憚  
于逢上官意指耻于結虜人懽心一意修守無飾門  
面人以為木僵而臣以為功首故臣手口拮据一切  
自固長策次第舉行以實心實政與諸將吏共矢諸  
天日不敢拾條陳故套以瀆聖聽至于今日處分  
臣嘔心泣血止以穩妥二字責當事至時日之遲速  
願我皇上以天覆地載之量容之庶擔荷者不至  
倉皇完事而貽後人以難結之局辱國體損國  
威更不淺矣臣接邸報廣東道御史李若星上曾抗



旨一疏娓娓千言極中邊方情形末云仍勅新按  
臣凡塞上有隱情不妨明白申奏夫有隱情而不  
敢奏或者起事之初主持錯謬及事體決裂而與  
地方官相爲塗飾臣到任甫十餘日循舊例報堂上  
官以交代日亦循舊例以報代書及故知因見封事  
重大謹與商議非任事日久中有牽連而首鼠兩端  
者也若星臣書未答而疏已先聞一腔慷慨激烈  
爲國熱衷令臣媿死矣第邊疆重務動關安危而  
臣最愚下徑情恐至誤國請益又成罪案則臣實

自苦矣臣嘗讀宋史見孫沔征儂智高求武庫精甲  
桑維翰曰毋張皇沔曰惟無備故至此今乃欲示鎮靜  
耶夫實備不修而貌爲鎮靜危亡之道也臣願以此  
責邊臣急於桑土又見富弼使契丹進爲翰林學士  
辭曰歲幣非臣本意久之又進樞密使辭曰契丹結  
好議者便謂無事萬一敗盟臣死且有罪願陛下臥  
薪嘗膽使天下知臣不受賞和未可保其於守備必  
不敢懈臣願以此責邊臣澹於嗜進更願臣廟堂之  
上寬以時日而責以成效無如張方平對宋仁宗曰

比來士大夫一動一爲恐致人言更相姑息專避嫌  
疑苟且因循求免謗咎何暇展布四體爲國立事  
哉允若茲邊臣不得藉口掣肘直懸賞罰以竢耳臣  
愚書生無當邊計緣職在糾察謬附芹曝之誼伏乞  
聖明勅下兵部酌議施行則邊疆幸甚臣無任悚  
息待命之至緣係備陳封事機宜仰俟廟堂採  
擇懇乞聖明勅賜議行以尊國體以固疆圉事  
理爲此具本專差舍人韓坤親齎謹題請旨奉  
聖旨這本說的是邊事但當修備至虜封遲速豈足

爲中國重輕督撫官不得輕聽要挾急于完事以遺  
後患兵部知道該本部覆奉

聖旨是